

Unit vaksinasi bergerak kunjungi rumah penjagaan warga emas

Oleh [Siti Haliza Yusop](#) - Jun 3, 2021 @ 4:39pm

bhnews@bh.com.my



Unit Bergerak Vaksinasi Pejabat Kesihatan Daerah Timur Laut, Pulau Pinang melawat 54 pusat penjagaan warga emas dan 663 penjaga telah divaksinasi. - Foto ihsan KKM

KUALA LUMPUR: Beberapa Unit Bergerak Vaksinasi membuat kunjungan ke pusat penjagaan warga emas di seluruh negara bagi memastikan semua lapisan masyarakat di negara ini menerima vaksin COVID-19 bagi membentuk imuniti berkelompok.

Jawatankuasa Khas Jaminan Akses Bekalan Vaksin COVID-19 (JKJAV) melalui ciapan di Twitter beberapa jam lalu, memuat naik beberapa gambar kunjungan unit bergerak itu ke pusat penjagaan warga emas termasuk di Pulau Pinang dan di Hulu Langat, Selangor.

Unit Bergerak Vaksinasi Pejabat Kesihatan Daerah Timur Laut, Pulau Pinang, setakat ini sudah mengunjungi 54 pusat penjagaan warga emas dan sehingga ini 1,330 warga emas dan 663 penjaga, sudah divaksin.

"Terdapat 80 pusat (penjagaan warga emas) dan kesemua dijangka menerima dos lengkap pada 30 Jun ini," katanya.

Melalui satu lagi ciapan di Twitter @JKJAVMY, turut dimuat naik gambar kunjungan Unit Bergerak Vaksinasi ke pusat penjagaan warga emas di Kuala Langat.

"Mereka berisiko tinggi dan perlu dilindungi," katanya.



Sebahagian petugas Unit Bergerak Vaksinasi Pejabat Kesihatan Daerah Timur Laut, Pulau Pinang. - Foto ihsan KKM

Isnin lalu, Menteri Sains, Teknologi dan Inovasi, Khairy Jamaluddin, berkata Jabatan Kesihatan Negeri dan Pejabat Kesihatan Daerah (PKD) diberi kebebasan menggunakan apa juga cara bagi memastikan penduduk di kawasan dan negeri masing-masing mendapat vaksinasi COVID-19.

Ia adalah sebahagian daripada inisiatif kerajaan dalam memastikan penduduk di negara ini mendapat vaksinasi terhadap wabak berkenaan.



Unit Bergerak Vaksinasi Pejabat Kesihatan Daerah Timur Laut, Pulau Pinang melawat 54 pusat penjagaan warga emas dan 663 penjaga telah divaksinasi. - Foto ihsan KKM